

17 DEC 1998

KELAB SENATOR LAHIRKAN SOKONGAN KPD KEPIMPINAN MAHATHIR

KUALA LUMPUR, 17 Dis (Bernama) -- Kelab Senator hari ini melahirkan sokongan kepada kepimpinan Perdana Menteri Datuk Seri Dr Mahathir Mohamad dengan menandatangani kad "Cinta Negara" di lobi Parlimen di sini.

Kad bertulis "Datuk Seri Dr Mahathir Mohamad kami tetap bersama mu" itu antara 70,000 kad yang telah terkumpul sebelum ini melalui kempen "Cinta Negara" sejak dua bulan lepas.

Yang turut menandatangani kad sokongan itu ialah Yang Dipertua Dewan Negara Tan Sri Mohamed Ya'acob.

Menteri Pembangunan Luar Bandar Datuk Annuar Musa berkata sejumlah 70,000 kad yang mengandungi kira-kira 1.4 juta tandatangan menyokong kepimpinan Dr Mahathir itu akan diserahkan kepada Perdana Menteri dalam satu majlis di Dewan Merdeka, Pusat Dagangan Dunia Putra, Sabtu ini.

"Tandatangan sokongan itu turut meliputi golongan warga desa yang terdiri daripada peneroka, penduduk kampung dan sebagainya yang telah dikumpul sejak dua bulan lepas," kata Annuar.

Sementara itu Timbalan Presiden Kelab Senator Datuk Mohd Zuki Kamaluddin berkata tandatangan itu sebagai menunjukkan sokongan anggota dewan itu kepada kepimpinan negara dalam menangani krisis ekonomi pada masa ini.

-- BERNAMA

MS NMO